

Na osnovu člana 71. i člana 125. Statuta Općine Vogošća ("Službene novine Kantona Sarajevo", broj: 27/14 - Prečišćeni tekst i broj:14/15 i 9/20), općinski Načelnik donosi:

## **P R A V I L N I K**

o uslovima, načinu i kriterijima dodjele novčane pomoći za liječenje ratnih vojnih invalida i članova njihovih porodica, članova porodica šehida i poginulih branilaca i demobiliziranih boraca – branioca sa područja općine Vogošća

### **Član 1.**

Ovim Pravilnikom utvrđuju se uslovi, način i kriteriji za odobravanje novčane pomoći licima iz člana 1. Zakona o pravima branilaca i članova njihovih porodica ("Službene novine Federacije BiH" broj: 33/04, 56/05, 70/07, 9/10, 90/17 i 29/22), a koji imaju prebivalište na području općine Vogošća.

### **Član 2.**

Pravo na novčanu pomoć mogu ostvariti lica iz člana 1. Pravilnika za slijedeće:

- za liječenje različitih malignih oboljenja, rijetkih oboljenja i drugih teških bolesti, a na osnovu preporuke Konzilija ljekara nadležne medicinske ustanove;
- za nabavku lijekova koji se ne nalaze na esencijalnoj listi lijekova Kantona Sarajevo;
- za participiranje u troškovima liječenja u inostranstvu, a na osnovu preporuke nadležne medicinske ustanove;
- za posebne potrebe kao što su elementarne nepogode i druge Projekte koje se odnose na pomoć licima boračkoj populaciji.

### **Član 3.**

Uslovi za ostvarivanje prava na novčanu pomoć na osnovu ovog Pravilnika su:

- da podnosilac zahtjeva ima prebivalište na području općine Vogošća;
- da je podnosilac zahtjeva lice iz člana 1. ovog Pravilnika;
- da ukupni mjesečni prihodi po članu zajedničkog domaćinstva ne prelaze iznos od 250,00 (dvijestotinepedeset) KM, osim u izuzetnim i opravdanim okolnostima koje će se cijeliti u svakom konkretnom slučaju;
- da nitko od članova porodičnog domaćinstva podnosioca zahtjeva nije vlasnik preduzeća, samostalne ili dopunske djelatnosti.

### **Član 4.**

Pravo na novčanu pomoć može se odobriti samo na osnovu podnesenog zahtjeva, potrebne dokumentacije i dokaza iz kojih se može utvrditi da li lice ili porodica ispunjava uslove iz člana 2. i 3. ovog Pravilnika.

### **Član 5.**

1) Zahtjev za dodjelu novčane pomoći po ovom Pravilniku podnosi se Službi za boračko-invalidsku i socijalnu zaštitu putem Centra za pružanje usluga građanima Općine Vogošća na propisanom obrascu.

2) Podnesene zahtjeve razmatra Služba za boračko-invalidsku i socijalnu zaštitu.

3) Služba će cijeliti da li je zahtjev opravdan i dati prijedlog za rješavanje.

4) Pravo na dodjelu novčane pomoći priznaje se Zaključkom koji donosi Općinski načelnik na prijedlog Službe.

### **Član 6.**

Odobrena novčana sredstva na ime novčane pomoći određuju se u zavisnosti od utvrđenog činjeničnog stanja, a najviše do 500,00 (petstotina) KM.

### **Član 7.**

- 1) Služba će podnesene zahtjeve rješavati po datumu podnošenja.
- 2) U izuzetnim slučajevima, a zbog težine bolesti i hitnosti slučaja, Služba će podnesene zahtjeve rješavati mimo procedure utvrđene stavom 1. ovog člana.
- 3) Podnosiocu zahtjeva može se odobriti jednokratna novčana pomoć samo jednom u toku budžetske godine, a izuzetno prema procjeni stanja, u opravdanim zdravstvenim slučajevima, dva puta u toku jedne budžetske godine i to do visine novčane pomoći utvrđene članom 6. ovog Pravilnika.

### **Član 8.**

Isplata gore navedenih odobrenih novčanih sredstava vrši se putem transakcijskog računa sve do utroška novčanih sredstava koja su predviđena Budžetom Općine Vogošća za navedenu namjenu, a za realizaciju isplate zadužuje se Služba za budžet Općine Vogošća.

### **Član 9.**

U posebnim slučajevima, radi utvrđivanja činjeničnog stanja, Općinski načelnik može imenovati komisiju koja će izvršiti uviđaj na licu mjesta i uvjeriti se u istinitost navoda iz podnijetog zahtjeva za odobravanjem novčane pomoći, o čemu sačinjava zapisnik.

### **Član 10.**

Stupanjem na snagu ovog Pravilnika, prestaje da važi Pravilnik o uslovima, načinu i kriterijima za odobravanje jednokratne novčane pomoći borcima-braniocima, članovima porodica šehida i poginulih boraca, ratnim vojnim invalidima i članovima njihovih porodica sa područja Općine Vogošća, broj: 09-41-356/18 od 13.02.2018.godine.

### **Član 11.**

Izmjene i dopune ovog Pravilnika vršit će se na način i po postupku koji važi za njegovo donošenje.

### **Član 12.**

Ovaj Pravilnik stupa na snagu danom donošenja, a objavit će se na oglasnoj ploči Općine Vogošća.

Broj: 09-37-211/23

Datum: 25.01.2023. godine

